

佛說觀彌勒菩薩上生兜率陀天經

宋居士沮渠京聲譯



	└─序起分┐證信序
	└─發起序
	├─正說分┤明外果──┘啟請
	└─解說────────┘總答
	別說────────┘廣詳────────┘諸天造外宮殿
	大神建善法堂
	└─五大神莊嚴內外
	└─終結
	└─結勸正觀
	└─明內果──┘啟請
	└─解說────────┘正說彌勒上生────────┘此沒
	└─彼生────────┘明上生殊勝
	明色身殊勝
	明冠現化身
	明相好光明
	明說法利益
	└─明下生年代
	細說往生修行法門──┘別明三品往生──┘弟子修六事上品生──┘修行
	發願
	往生
	天讚
	生彼利益
	└─結成
	眾部生善敬中品生
	└─犯戒者懺悔下品生──┘明懺淨
	明往生
	└─明得益
	└─舉德普勸往生──┘明普作歸依
	示觀行
	└─滅罪業
	└─聞法發願往生
	└─結成正觀
	└─流通分

南無本師釋迦牟尼佛

自歸於佛 當願眾生 紹隆佛種 發無上意

自歸於法 當願眾生 深入經藏 智慧如海

自歸於僧 當願眾生 統理大眾 一切無礙

佛說觀彌勒菩薩上生兜率陀天經

如是我聞：一時，佛在舍衛國祇樹給孤獨園。

爾時，世尊於初夜分，舉身放光。其光金色，繞祇陀園，周遍七匝。照須達舍，亦作金色。有金色光，猶如段雲，遍舍衛國，處處皆雨金色蓮花。其光明中，有無量百千諸大化佛，皆唱是言：今於此中，有千菩薩，最初成佛名拘留孫，最後成佛名曰樓至。說是語已。

尊者阿若憍陳如即從禪起，與其眷屬二百五十人俱；尊者摩訶迦葉與其眷屬二百五十人俱；尊者大目犍連與其眷屬二百五十人俱；尊者舍利弗與其眷屬二百五十人俱；摩訶波闍波提比丘尼與其眷屬千比丘尼俱；須達長者與三千優婆塞俱；毘舍佉母與二千優婆夷俱。復有菩薩摩訶薩名跋陀婆羅，與其眷屬十六菩薩俱；文殊師利法王子與其眷屬五百菩薩俱。天龍夜叉乾闥婆等一切大眾，覩佛光明，皆悉雲集。

爾時，世尊出廣長舌相，放千光明。一一光明，各有千色。一一色中，有無量化佛。是諸化佛，異口同音，皆說清淨諸大菩薩甚深不可思議諸陀羅尼法。所謂：阿難陀目佉陀羅尼、空慧陀羅尼、無礙性陀羅尼、大解脫無相陀羅尼。

爾時，世尊以一音聲，說百億陀羅尼門。說此陀羅尼已。

爾時，會中有一菩薩，名曰彌勒，聞佛所說，應時即得百萬億陀羅尼門，即從座起，整衣服，叉手合掌，住立佛前。

爾時，優波離亦從座起，頭面作禮，而白佛言：世尊！世尊往昔於毘尼中及諸經藏說「阿逸多次當作佛」，此阿逸多具凡夫身，未斷諸漏，此人命終，當生何處？其人今者，雖復出家，不修禪定，不斷煩惱，佛記此人成佛無疑。此

人命終生何國土？

佛告優波離：諦聽！諦聽！善思念之！如來、應、正遍知，今於此眾，說彌勒菩薩摩訶薩阿耨多羅三藐三菩提記。此人從今十二年後命終，必得往生兜率陀天上。

爾時，兜率陀天上，有五百億天子，一一天子皆修甚深檀波羅蜜，為供養一生補處菩薩故。以天福力，造作宮殿，各各脫身栴檀摩尼寶冠，長跪合掌，發是願言：「我今持是無價寶珠及以天冠，為供養大心眾生故，此人來世不久當成阿耨多羅三藐三菩提。我於彼佛莊嚴國界得受記者，令我寶冠化成供具。」如是，諸天子等各各長跪，發弘誓願，亦復如是。時，諸天子作是願已，是諸寶冠化作五百萬億寶宮，一一寶宮有七重垣，一一垣七寶所成，一一寶出五百億光明，一一光明中有五百億蓮花，一一蓮花化作五百億七寶行樹，一一樹葉有五百億寶色，一一寶色有五百億閻浮檀金光，一一閻浮檀金光中，出五百億諸天寶女，一一寶女住立樹下，執百億寶無數瓔珞，出妙音樂，時樂音中演說不退轉地法輪之行。其樹生果，如頗梨色，一切眾色入頗梨色中。是諸光明，右旋宛轉，流出眾音，眾音演說大慈大悲法。一一垣牆，高六十二由旬、厚十四由旬，五百億龍王圍繞此垣。一一龍王雨五百億七寶行樹，莊嚴垣上。自然有風吹動此樹。樹相振觸，演說苦、空、無常、無我、諸波羅蜜。

爾時，此宮有一大神名牢度跋提，即從座起，遍禮十方佛，發弘誓願：「若我福德，應為彌勒菩薩造善法堂，令我額上自然出珠。」既發願已，額上自然出五百億寶珠，瑠璃、頗梨，一切眾色無不具足，如紫紺摩尼，表裏映徹。此摩尼珠迴旋空中，化為四十九重微妙寶宮。一一欄楯萬億梵摩尼寶所共合成，諸欄楯間自然化生九億天子、五百億天女。一一天子手中化生無量億萬七寶蓮花，一一蓮花上有無量億光。其光明中具諸樂器，如是天樂，不鼓自鳴。此聲出時，諸女自然執眾樂器，競起歌舞。所詠歌音，演說十善、四弘誓願。諸天聞者，皆發無上道心。

時，諸垣中有八色瑠璃渠，一一渠有五百億寶珠而用合成。一一渠中有八味水，八色具足。其水上湧，繞梁棟間。於四門外，化生四花。水出花中，如寶花流。一一花上有二十四天女，身色微妙，如諸菩薩莊嚴身相。手中自然化五百億寶器，一一器中，天諸甘露自然盈滿。左肩荷佩無量瓔珞，右肩復負無量樂器，如雲住空，從水而出，讚歎菩薩六波羅蜜。若有往生兜率天上，自然得此天女侍御。亦有七寶大師子座，高四由旬，閻浮檀金無量眾寶，以為莊嚴。座四角頭，生四蓮花。一一蓮花，百寶所成，一一寶出百億光明，其光微妙，化為五百億眾寶雜花莊嚴寶帳。

時，十方面百千梵王，各各持一梵天妙寶，以為寶鈴，懸寶帳上。

時，小梵王持天眾寶，以為羅網，彌覆帳上。

爾時，百千無數天子天女眷屬，各持寶花，以布座上。是諸蓮花，自然皆出五百億寶女，手執白拂，侍立帳內。持宮四角有四寶柱，一一寶柱，有百千樓閣，梵摩尼珠以為交絡。

時，諸閣間有百千天女，色妙無比，手執樂器，其樂音中，演說苦、空、無常、無我、諸波羅蜜。如是天宮，有百億萬無量寶色，一一諸女亦同寶色。

爾時，十方無量諸天命終，皆願往生兜率天宮。

時，兜率天宮有五大神：

第一大神，名曰寶幢，身雨七寶，散宮牆內，一一寶珠化成無量樂器，懸處空中，不鼓自鳴，有無量音，適眾生意。

第二大神，名曰花德，身雨眾花，彌覆宮牆，化成花蓋，一一花蓋百千幢幡以為導引。

第三大神，名曰香音，身毛孔中，雨出微妙海彼岸栴檀香，其香如雲，作百寶色，繞宮七匝。

第四大神，名曰喜樂，雨如意珠。一一寶珠，自然住在幢幡之上，顯說無量歸佛、歸法、歸比丘僧，及說五戒、無量善法諸波羅蜜，饒益勸助菩提音者。

第五大神，名曰正音聲，身諸毛孔流出眾水，一一水上有五百億花，一一花上有二十五玉女，一一玉女身諸毛孔，出一切音聲，勝天魔后所有音樂。

佛告優波離：此名兜率陀天十善報應勝妙福處。若我住世，一小劫中，廣說一生補處菩薩報應，及十善果者，不能窮盡。今為汝等，畧而解說。

佛告優波離：若有比丘及一切大眾，不厭生死，樂生天者、愛敬無上菩提心者、欲為彌勒作弟子者，當作是觀。作是觀者，應持五戒、八齋、具足戒，身心精進，不求斷結，修十善法，一一思惟兜率陀天上妙快樂。作是觀者，名為正觀，若他觀者，名為邪觀。

爾時，優波離即從座起，整衣服，頭面作禮，白佛言：世尊！兜率陀天上，乃有如是極妙樂事。今此大士，何時於閻浮提沒，生於彼天。

佛告優波離：彌勒先於波羅捺國劫波利村波婆利大婆羅門家生，却後十二年二月十五日，還本生處，結跏趺坐，如入滅定。身紫金色，光明艷赫，如百千日，上至兜率陀天。其身舍利，如鑄金像，不動不搖。身圓光中，有首楞嚴三昧，般若波羅蜜字義炳然。時，諸天人尋即為起眾寶妙塔，供養舍利。時，兜率陀天七寶臺內，摩尼殿上師子床座，忽然化生，於蓮花上結跏趺坐。身如閻浮檀金色，長十六由旬，三十二相、八十種好，皆悉具足。頂上肉髻，髮紺瑠璃色，釋迦毘楞伽摩尼，百千萬億甄叔迦寶，以嚴天冠。其天寶冠，有百萬億色，一一色中，有無量百千化佛，諸化菩薩以為侍者。復有他方諸大菩薩，作十八變，隨意自在住天冠中。彌勒眉間有白毫相光，流出眾光，作百寶色。三十二相，一一相中有五百億寶色，一一好中亦有五百億寶色。一一相好艷出八萬四千光明雲。與諸天子各坐花座，晝夜六時，常說不退轉地法輪之行。經一時中，成就五百億天子，令不退轉於阿耨多羅三藐三菩提。如是處兜率陀天，晝夜恆說此不退轉法輪，度諸天子。閻浮提歲數五十六億萬歲，爾乃下生於閻浮提，如彌勒下生經說。

佛告優波離：是名彌勒菩薩於閻浮提沒，生兜率陀天因緣。

佛滅度後，我諸弟子，若有精勤，修諸功德，威儀不缺，掃塔塗地，以眾名香、妙花供養，行眾三昧，深入正受，讀誦經典，如是等人，應當至心，雖不斷結，如得六通。應當繫念，念佛形像，稱彌勒名。如是等輩，若一念頃，受八戒齋，修諸淨業，發弘誓願，命終之後，譬如壯士屈伸臂頃，即得往生兜率陀天，於蓮花上，結跏趺坐。百千天子作天伎樂，持天曼陀羅花、摩訶曼陀羅花，以散其上。讚言：「善哉！善哉！善男子！汝於閻浮提廣修福業，來生此處，此處名兜率陀天，今此天主名曰彌勒，汝當歸依。」應聲即禮，禮已，諦觀眉間白毫相光，即得超越九十億劫生死之罪。是時，菩薩隨其宿緣，為說妙法，令其堅固，不退轉於無上道心。如是等眾生，若淨諸業，行六事法，必定無疑當得生於兜率天上，值遇彌勒，亦隨彌勒下閻浮提，第一聞法。於未來世值遇賢劫一切諸佛，於星宿劫亦得值遇諸佛世尊，於諸佛前受菩提記。

佛告優波離：佛滅度後，比丘、比丘尼、優婆塞、優婆夷、天、龍、夜叉、乾闥婆、阿修羅、迦樓羅、緊那羅、摩睺羅伽等，是諸大眾，若有得聞彌勒菩薩摩訶薩名者，聞已歡喜，恭敬禮拜。此人命終，如彈指頃，即得往生，如前無異。但得聞是彌勒名者，命終亦不墮黑闇處、邊地、邪見、諸惡律儀，恆生正見，眷屬成就，不謗三寶。

佛告優波離：若善男子善女人，犯諸禁戒，造眾惡業，聞是菩薩大悲名字，五體投地，誠心懺悔，是諸惡業，速得清淨。未來世中諸眾生等，聞是菩薩大悲名稱，造立形像，香花衣服繒蓋幢幡，禮拜繫念。此人命欲終時，彌勒菩薩放眉間白毫大人相光，與諸天子，雨曼陀羅花，來迎此人。此人須臾，即得往生，值遇彌勒，頭面禮敬。未舉頭頃，便得聞法，即於無上道得不退轉。於未來世，得值恆河沙等諸佛如來。

佛告優波離：汝今諦聽！是彌勒菩薩當為未來世一切眾生作大歸依處。若有歸依彌勒菩薩者，當知是人於無上道，得不退轉。彌勒菩薩成多陀阿伽度、阿羅訶、三藐三佛陀時，如此行人，見佛光明，即得受記。

佛告優波離：佛滅度後，四部弟子、天、龍、鬼神，若有欲生兜率陀天者，當作是觀，繫念思惟，念兜率陀天，持佛禁戒，一日至七日，思念十善，行十善道。以此功德，迴向願生彌勒前者，當作是觀。作是觀者，若見一天人坐一蓮花，若一念頃，稱彌勒名，此人除却千二百劫生死之罪。但聞彌勒名，合掌恭敬，此人除却五十劫生死之罪。若有禮敬彌勒者，除却百億劫生死之罪。設不生天，未來世中，龍花菩提樹下，亦得值遇，發無上道心。

說是語時，無量大眾即從坐起，頂禮佛足，禮彌勒足，繞佛及彌勒菩薩百千匝。未得道者，各發誓願：我等天人八部，今於佛前發誠實誓願，於未來世值遇彌勒，捨此身已，皆得上生兜率陀天。

世尊記曰：汝等及未來世，修福持戒，皆當往生彌勒菩薩前，為彌勒菩薩之所攝受。

佛告優波離：作是觀者，名為正觀，若他觀者，名為邪觀。

爾時，尊者阿難即從座起，叉手長跪，白佛言：世尊！善哉，世尊！快說彌勒所有功德，亦記未來世修福眾生所得果報。我今隨喜，唯然，世尊！此法之要，云何受持？當何名此經？

佛告阿難：汝持佛語，慎勿忘失。為未來世開生天路示菩提相，莫斷佛種。此經名《彌勒菩薩般涅槃》，亦名《觀彌勒菩薩上生兜率陀天勸發菩提心》，如是受持。

佛說是語時，他方來會十萬菩薩，得首楞嚴三昧。八萬億諸天，發菩提心。皆願隨從彌勒下生。

佛說是語時，四部弟子、天龍八部，聞佛所說，皆大歡喜，禮佛而退。

佛說觀彌勒菩薩上生兜率陀天經

彌勒甚深微妙法 千生萬劫喜相逢 我今依教勤受持 性相圓融一貫通



香港新界屯門藍地青山公路18號 <https://www.mfbm.hk>
18 Castle Peak Road, Lam Tei, Tuen Mun, NT, Hong Kong